

Veta LFP fó Impaktu ba Timor GAP Atu Halo Investmentu



Prezidente Parlamentu Nasionál, Arão Noé de Jesus da Costa Amaral. Imajen Tatoli/António Gonçalves

DILI, 27 novembru 2019 (TATOLI) – Prezidente Parlamentu Nasionál (PPN), Arão Noé de Jesus da Costa Amaral, konsidera veta Lei Fundu Petrolífera (LFP) lori impaktu ba investmentu empreza estatál Timor GAP.

“Impaktu ba kompañia Timor GAP, tanba nia presiza kapitál atu halo investmentu. Bainhira kapitál laiha problema”, Arão Noé informa ba jornalista sira iha sesintu Parlamentu Nasionál (PN), kuarta ne’e.

PPN ko’alia asuntu ne’e, relasiona ho Prezidente Repúblika (PR), Francisco Guterres Lú Olo veta Dekretu Parlamentu Nasionál n° 11/V, alterasaun daruak ba Lei n° 9/2005, 3 Agostu, Lei Fundu Petrolíferu, tanba konsidera lejizladór sira hakarak fó dalan ba investmentu operasaun petrolífera, ne’ebé atu hetan valór persentu no reál ho persentajen aas liu investmentu seluk, maski investmentu seluk fó retornu finanseiru aas iha prazu badak ba Fundu Petrolíferu, garantidu, no risku kiik.

Nune’e, Xefe Estadu deklarara veta número 3 husi artigu 15ºA LFP, tanba haree artigu ne’e inkonstitusionál hasoru Konstituisaun, tuir akórdaun ho deklarasaun conjunta juís tolu hosi Tribunál Rekursu.

Tuir Arão Noé, intensaun PN halo alterasaun ba artigu iha LFP ne’e tanba atu loke dalan ba kompañia Timor GAP atu halo investmentu.

Nia fó ezemplu, bainhira investidór ida mai investe maibé Timor GAP laiha kapitál, Timor-Leste bele lakon oportunitade.

Deputadu Bankada CNRT ne’e informa tan, hafoin PR veta LFP, sei fila-fali ba PN Hodi halo apresiasaun.

“Tuir Konstituisaun no Rejimentu Parlamentu, iha loron 90 ba Parlamentu bainhira hakarak halo apresiasaun fila-fali, maibé tanba agora iha faze debate orsamentu, ami sei rai lai hafoin konklui aprovasaun Orsamentu 2020 nian maka sei tau fali ajenda ba asuntu ne’e”, nia akresenta.

Ba asuntu apresiasaun, nia esplika, Parlamentu iha opsaun tolu hanesan konfirma no haruka fila ba PR, halo alterasaun, ka bele mós lalika book tan lei ne’e.

Arão Noé subliña, opsaun tolu ne’e atu la’o ka lae depende ba desizaun plenária.

Nia akresenta, ba Lei Atividade Petrolífera (LAP) laiha problema tanba oras ne’e vigora no publika ona iha Jornál Repúblika.

Jornalista: Evaristo Soares Martins Editór: Xisto Freitas